

HAPU NA PAHHI CATÊJÊ JÕ KÀHHÔC

2

*Pê carĩjre côjkwa wỳr Erij to api
2 Pahhi Catêjê 2.1-14*

Ne jũ mã ihkôt ipa na caku te, jirô pê mã ri, Pahpãm te ma amji wỳr côjkwa wỳr, carĩjre to Erij to hàpir xà jõ amcroa kam hàhhuc. Mã cormã Erixêw apu Erij kôt mỗ. Ne ma Krĩjajojõ pjê pĩn me mỗ, mã Erij te Erixêw cajpêr prãmte cumã harkwa to:

— Ita ri ahtwỳ, nãmri quê ha ma Pahpãm Peter jõkrĩ wỳr ikujate — hajỳr.

Mã Erixêw cumã:

— Wa ha Pahpãm kam mare mã amã amji jarẽ, jũ wỳr wa are — hane. Nema ajwar me mỗ, Peter jõ krĩ wỳr. Ne pê curi Pahpãm jarkwa tohahkre xà jũrkwa nõ ita xa.

Mã Pahpãm jarkwato hahkre catêjê kwỳ in-tuwitajê ajpên mehwỳr me pra, ne cute mehcaj-par ne me Erixêw mã:

— Xà ca ramã ate ita kam, Pahpãm te ma gõ pahhi pê Erij to ihtêm na, hahkre pej? — hajỳr.

Mã Erixêw me cumã:

— Wa ite ramã hahkre pej, mêr me kêt — hane.

Mã Erij Erixêw mã:

— Quê ha ma Pahpãm Krĩcuxwati wỳr ikujate, ca ha ita ri ahtwỳ — hane.

Mã hipêr Erixêw cumã:

— Wa ha Pahpām kam mare mǎ amǎ amjijarē, wa nee arer nare — hane. Ne ma memō, Krīcuxwati wȳr. Mǎ curi hanea ne Pahpām jarkwa to hahkre xà jūrkwano ita xa, mǎ curi me cator.

Mǎ me hȳrmǎ Pahpām jarkwa to hahkreatêjê kwȳ me pra, ne cute me Erixêw cukij to:

— Xà ramǎ ate ita kam Pahpām te ma Erij japrôr ne to ihtēm na, hahkre pej? — hajȳr.

Mǎ Erixêw me cumǎ:

— Ȳhȳ, wa ite hahkre pej, mēr me kêt — hane.

Mǎ Erij Erixêw mǎ:

— Quê ha ma Pahpām Cōpijapjêr jō cō wȳr ikujate, na ca ha ita ri ahtwȳ — hane.

Mǎ Erixêw cumǎ:

— Wa ha Pahpām kam mare mǎ amǎ amji jarē, jū wȳr wa ha are — hajȳr.

Ne ma Cōpijapjêr jō cō wȳr me mō. Mǎ ma Pahpām mǎ me hâpêncatêjê intuw te me xīncwēnta ne ihkôt me mō, ampȳa mǎ cute me hōmpunprāmte. Mǎ Erij te ihkà japjêhti ata to cajôt ne to cō cakwīn, mǎcô picapôn ne ihcajpuw amcràare. Mǎ me ipijakrut itajê ihkôt me irêr. Mǎ Erij te Erixêw mǎ harkwa to:

— Ca ha ampo na iwȳ, waha itȳj, itēm xwȳjrea na, amǎ ampo ata gō — hajȳr.

Mǎ Erixêw cumǎ:

— Wa ha Pahpām te ato acarôt tȳjti ita jirôa pê to ajkrut ne ahna awȳ — hane.

Mǎ Erij cumǎ:

— Ca ate atȳj ampo catia ne ahna iwȳr, ne ca ha ate itēm xà na ipupunna, ca ha atȳj amji mǎ ate ampo na iwȳr xà ita cwa. Nāmri ca ha ate

itēmxà ita na ipupun nare na, ca ha neeate ampo na iwÿr xà ata cwÿr nare — hane.

Ne ma me mōr ita kam, me amji mǎ mehçakôc to mō, mǎ ihprôt pê cuhy tecawrô jō kujti ita cōjkwa pīn cator, ne cuteme to ipicapôn. Mǎ ma carījre te cōjkwa wÿr Erij to hàpir. MǎErixêw te ita pupun ne caràar kam cumǎ harkwa to:

— Inxū, inxū! Ixaher catêjê jō cawrô me hō kujti, ca me hōmpu he! — hajÿr. Mǎ ma me ipictor.

Mǎ Erixêw te apu amji pê ihkàcokjêr, ne ma cute Erij pê ihkà pÿm ata pyr ne to mō, cō wÿr. Ne cute Erij cuxà to cō cakwīn, mǎ cō picapôn ne ihcajpuw pjê incràre, mǎ ma irêr. Ne pê ita caxuwErixêw pê Erij jakàn pê Ixaher catêjê mǎ Pahpām jarkwa to ihçakôc catê.

4

Pê Erixêw cahāj pijapit mǎ hō ampo to impê xà to ajcamē

2 Pahhi Catêjê 4.1-7

Pê Pahpām jarkwa to hahkre catêjê intuwatajê nō hikwa tuw, ne jū mǎ ahna caku pê ty. Mǎ ma hīxi Erixêw wÿr cator. Ne cute cumǎ amji jarēn to:

— Por pê ipjê pê amǎ hàpên catê ata ramǎ ihtyc. Ne cumǎ Pahpām kīn na, amǎ hahkre pej. Pê jūm ita to new catia to cati, ne ahnaa ihtyc, mǎ ramǎ ina ahwÿ, ite cumǎ ipjê te to new ata jahpan xà na ijàmjôrprāmte. Ne ampo to wa cumǎ amgō? Na quê ha ma ipê ikra xūmre pijakrut itajê japrô, ne amji mǎ me tocumǎ hàpên catêjê na rohnÿtti mǎ — hajÿr.

Mã Erixêw cumã:

— Jũ mã wa ha ajte ato? Ampo mã gũrkwa kam amã? — hane.

Mã impijapit ita cumã:

— Ipê ampo hamreare, ne imã ampo to impê xàna incjên xà pyxit peaj ne xa — hajjyr.

Mã Erixêw cumã:

— Hã, ca ha tẽ ne me acahi na amehkrĩ atajê pê ampo to impê xàrun xà cunea incwa, ne amcro nõ na hacpyã mã mecumã hõr na me cumã harên hiahpuro. Ne gũrkwa mãto acjêj pa, ne amji na to hihê. Ne me hãmrunxà atajê cunea kam ampo to impê xà pyxit ita jaxwỳ, quê ha amjia kôt hipêr amji to hipu to mõi, ne ihcunea to hipu partu, quê ha to hipupa, me ajkaam incrã — hane.

Mã ma tẽ ne cute mehkra mãn. Mã cute cumãme hãmrun xà to cuprõn, mã cute to hipu partu. Ne ramã me hãmrun xà jamre, me ajkaam mã ampo to impê xà jamre.

Mã ma hacpyã mã Erixêw wỳrtẽ, ne apu cumã harẽ, mã cumã:

— Hã, ca ha tẽ ne ampo to impê xà ata to ihpore na ahpa, ne ihporeto ate new ata jahpan xà na amgõ. Quê ha cormã ihpore cahhur ata me amãahtwỳ. Ne pom quê ha ihpore cahhur ahtwỳ ita, quê ha ihtjy akra me, ate amji to me apijapar na meatehcajpa — hane.

Mã cahj pijapit ita te harkwa kôtton partu, ne ihkên pê amji pytar.

5

Pê Namã ma Ixaher jô pjê wÿr tẽ

2 Pahhi Catêjê 5.1-8

Ne pê caku atajê kam pê Xiri jô pjê kamkrãhtare jô pahhi nō ita japrÿ Namã. Ne ampeajkam ihpa tÿj cacrô apu ihkà xêtti. Ne ihxêtti ata quê ha ihkêanre kam, ihtÿj jũ caxuw ihcura.

Pê Xiri jô krãhtare ma Ixaher catêjê jô pjê wÿr me pra ne ajco pyjê to me ahkĩ. Pê Namã hanea ne jũm cuprÿre ita japrô, ne hĩximã cugô, cute amji mã to cumã hàpên catê prãmte. Neamcro nō na cahãj cuprÿre ita te hō pahhi cahãj ita mã:

— Quê rÿ mã ijō pahhi pê Namã ijō pjê kam Pahpãm jarkwa to ihcakôccatê ata mã ihkà xêt ita na amji jarê, quê caprã — hajÿr.

Mã hĩxi te impjên mã hũjarên. Mã Namã te Xiri jô pahhi mãita na amji jarên. Mã hō pahhi te cumã:

— Hã, mêr mō ne Pahpãm jarkwa to ihcakôc catêita pupu ne cumã amji jarê. Wa ha Ixaher catêjê jô pahhi mã ana ihkàhhôc kujate — hajÿr.

Mã Namã te amji caprãr jahpan xà na cumã ampo jôr xà na cumã kên pràtime, wakÿre pràti me, ihkà me, ma to mō. Ne ma hanea ne hō pahhi jô kàhhôc ata, Ixaher catêjê jô pahhi wÿr to mō.

Mã ihkàhhôc ata hũjarên to:

“ÿhÿ, Ixaher jô pjê jô pahhi ita.

Ipê Xiri jô pjê jô pahhi.

Ne por amã ihkàhhôc to mō ata pê imã hàpên catê.

Ca ha imã, cumã ihkà xêtti ita caprã” hajÿr.

Mã Namã Ixaher jô pahhi wÿr ihkàhhôc itato cator, ne cute cumã hôr. Mã cute ihkàhhôc ita cahyt jirô pê mări, cute ihpeacre na me hahkre pej prãnte, amji pêhitô kà jipôn, cute me amji kam hapac xàa kôt. Ne me cumã:

— Xiri jô pjê jô pahhi ita te imã ihkà xêtti ita kujahêc, wa caprã. Xà ajkî ipê Pahpãm, wa caprã, ne itÿj cumã cute amji kam hapac xà tuwti nõ gô? Hãpà! Tee ame papijapu prãnte me pahto hahkre — hajÿr.

Mã Pahpãm jarkwa to ihcakôc catê pê Erixêw tepahhi peacre na harên par, ne cumã harkwa kujahêc ne cumã:

— Ampo na mã ca apu apec? Ajpên imã Namã kujate, wa ha pa caprã. Quê ha ihtÿj cormã ita ri, pjê ita kam, Pahpãm mã hàpên catê te ipa nahômpu ne hahkre pej — hajÿr. Mã Ixaher jô pahhi te Erixêw wÿr Namã kà xêtti ata kujahêc.

Namã caprãr xà

2 Pahhi Catêjê 5.9-17

Mã ma Namã tẽ ne Erixêw jÿrkwa wÿr cator, ne harkwa mã hõ cawrô me hõkujti to hàhhuc. Mã Erixêw nee hÿrmã cator nare, ne cute hÿrmã cumãhàpên catê nõ pit kujahêc, quê to ihhimpej to hane he:

— Ca ha ma Còpijapjêr jô cô wÿr tẽ, ne kam amrôr to xet, ne amjicajpêr pyrentu, quê ha akà xêt ita amã hamre, ne akà tetet, ne ramã acaprãr — hajÿr.

Mã Namã apu incryac to incryc, ne ma mõi, ne cute cumãme hàpên catêjê mã harkwa to:

— Wa itỳj amji mã: “Mõrmõ quê ha iwỳr cato ne ijũ na cupy, wa haajpẽn mã me icakôc, quê ha ina hũ xi ne Pahpãm mã icajrẽn” hajỳr, cakrô mã ajte nee cute ito hajỳr nare, ne cama cute imã harkwa ita kujahêc. Ne ijõ pjê kam cô ita, Ixaher jõ pjê jõ cô itajê cuneajirôa pê ihtetet ne impej, cute jũm caprãr xà caxuw. Ne mẽr ampo na mã wa curi cô ata kam ixwỳr, quê icaprãr nare? — hajỳr. Ne apuincryc ne ma cawrô jõ kujti to tẽ.

Mã ihteam kam cumã mehàpên catêjê te me cumã harkwa to:

— Ijõ pahhi, quê Pahpãm jarkwa to ihcakôc catê camaampo jahkre kêatre na amẽ namã, ca ha atỳj to. Nõ nãmã ca ha ajte nee hahkre kêt nare ita ton nare? — hajỳr.

Mã Namã te cumã me hàpên catêjê impar, ne maCòpijapjêr jõ cô wỳr mõ. Ne cute kam mrõr to xet, mã pea ihkà impejpyrentu, ne ihkà ita pê ihhêj rũm ahkrare kàtetet. Mã Namã me, cumã me hàpên catêjê me, ma mehcunea te me amji jaxàr, Pahpãm jarkwa to ihcakôc catê wỳr, ne me cator, ne cuna mãme xa. Mã Namã te Erixêw mã harkwa to:

— Hamre, ita caxuw wa ite pjê cunea kam Pahpãm ita pyxit peaj na hahkre pej, ne cupê Ixaher catêjê Pãm Cati. Xà ca ha atỳj ate icaprãr jahpan xà na, ite amã ampo jõr xà itana amji capa? — hajỳr.

Mã Erixêw cumã:

— Wa ha Pahpãm kam mare mã amã amji jarẽ, wa nee ihnõ na amji caxàrnare — hane. Mã Namã ihtỳj cormã to kampa, mã nee cute ihnõ na amji caxàr nare.

Mã Namã cumã:

— Wa ha ma ijõ pjê wÿr amji jaxà, nepor Ixaher catêjê Pãm Cati pyxit peajata, wa ha itÿj kampa, ne to pit mã, amji mã ihmpej to ipa — hane. Ne macute amji jaxàr, hõ pjê wÿr.

6

Côjkwa pÿn Pahpãm jõ krãhtare 2 Pahhi Catêjê 6.8-18

Ne pê caku nõ na, Xiri catêjê me, Ixaher catêjême ipijapu kam tẽ. Ne hãn ne ajco me kam imprar xà wÿr, Xiri catêjê jõ pahhihõ krãhtare jõ pahhi kwÿ me ajpẽn pa, ne me ajpẽn mã:

— Por curi me papicaxêr xà ata ri, pjê ata kam, cu ha me pajõ krãhtare to me cuprõ, pahte me Ixaher catêjê jõ pahhi pro prãmte — hane.

Mã ramã Erixêw te mehahkre pej, ne Ixaher jõ pahhi mã hũjarên, mâr quê amji to huphê, quê Xiri catêjê jõ pahhi ata nee mehpro nare. Hõ, pê ajco Erixêwjũjarên xà ata me cumã amji jahkre pej gõ to hane, na pê me amji pytà. Ne ihtÿj ajco me to hajÿr to xa.

Mã Xiri catêjê jõpahhi tee apu amji jahkre, jũ mã quê ha ajte. Ne pea cute krãhtare jõpahhi catêjê na hàhwÿr, ne me cumã:

— Jũm te mã ajte Ixaher jõ pahhi mã pahte me ajpẽn par xà ita jarên? — hajÿr.

Mã krãhtare jõ pahhi nõ ita cumã:

— Nee me pahkwÿ nõ te me hõ pahhi mã hũjarên nare. Ne por Pahpãm jarkwa toihcakõc catê pê Erixêw ata te ri hõ pahhi mãhũjarên, ne

ihťyj cumã ate ahtee gũrkwa caxwỳn kam acakõc xà ton atajahkre pej — hane.

Mã Xiri catêjê jõ pahhi te ahna me mẽn, ne me cumã:

— Me hapên to mõi ne mehpro — hajỹr.

Mã amcro nõ na jũm te Xiri catêjê jõ pahhi mã Kwapijakrut jõkrĩ kam Erixêw apu mõi na harẽn. Cwỳrjapê ri pahhi te hỹrmã hõ krãhtare jãhtõa ne ihkujahêc, hõcawrõ me, hõ kujti mea mã. Mã caxwa ri Kwapijakrut jõ krĩ mã me cator, ne cute me krĩ krã.

Mã Erixêw mã hapên catê nõ intuwre nõ ita irarà na hỹr, necute põi pê, krĩ pu na Xiri catêjê jõ krãhtarekwỳ pupun. Mã me cumã hũpa mã ma Erixêw wỳr tẽ, ne cute cumã hũjarẽn to:

— Ijõ pahhi! He ramã me pahcurê xwỳn te me pahkrã tu ita kam, jũ mã cu ha ajte? — hajỹr.

Mã Erixêw cumã:

— Apu amji mã panare. Ampo na? Pom me cumã krãhtare jãhtõ ita jirõa pê ri me pamã hàhtõ — hane. Ne cute Pahpãm wỳr ne cumã:

— Me ijõ Inxũ, wa ha awỳ, ca ha imã hapên catê ita to jũ mã, quê cõjkwa pĩn me pra jõ krãhtare pupu — hajỹr.

Mã Pahpãm te ihhêj ne into jahkjên, mãrquê ihtỹj me hõ krãhtare pupu. Mã cute cuhy te cawrõ me, hõ kujti ita me hàhkà jakõt nõ ita to hipu tu na hõmpun.

Mã ramã ajpên Xiri catêjê jõ krãhtare te amjimã mõi, krĩ wỳr.

Mã Erixêw te Pahpãm wỳr ne cumã:

— Me ijõ Inxũ, me to into tũm — hajỹr. Mã Pahpãm te Xiri catêjê jõkrãhtare cunea to into

tũm. Hõ, Pahpãm te me to hajÿr, ne me cupê cumã hàpên catê ata pytàr. Hamre.

PJÊ JÕ PAHHI CATÊJÊ KWÿ

11

ÿhÿ, pê pahhi Xarômãw tyc jakàn pê ri, pê Juta catêjê atajê me cupê Tawi tàmxwÿ catêjê to pit mã amjimã me hõ pahhi. Pê pahhi kwÿ crêre atajê impej ne ihtÿj Pahpãm jarkwa kôt ame ipa. Ne mehkĩnte pahhi kwÿ cati atajê ma ame Pahpãmcaaca, ne ihtÿj, mehkwy meã mã, me to hapac kêt to me mõ.

Juta jõ pjê jõ pahhi Jõwat jarẽn xà 2 Pahhi Catêjê 11.1-21

Pê caku jãhtõa jirõ pê, Juta jõpjê jõ pahhi nõa ty. Ne pê ihtÿj ihkra jaxà kam, inxi amji to pahhi prãm. Ne pê cahãj ata japry Atarijkwÿj, ne ihkêanre. Ne cute ihtãmwxwÿ itajêcunea jipej na me mên, mã cute me hipej. Pê pyxit peaj ne cormã incuire, ne hapry Jõwat. Pé into catyire haprõ, ne ma to tẽ, ne Pahpãm tome amji kam hapac xà jũrkwa kam to amxu. Mã nee cute ihcuran nare. Mã curia cute me to ipijapar to caku to xêj.

Mã Atarijkwÿj te amji to pahhi, ne ihhimpej to caku to xêj. Mã Pahpãmmã mehcajrẽn catêjê jõ pahhi pê Jojata te me hũjamãr catêjê jõpahhi na hàhwÿr. Pom krãhtare Pahpãm to me amji kam hapac xà jũrkwajamãr catêjê atajê jõ pahhi me, me Atarijkwÿj jũrkwa jamã atajê jõ pahhi me, cute me ahna hàhwÿr.

Mã cute me cuprõn, ne ma ajpën pê ame jũm te, jũm mã Jojata cakõc xà ata jarën tête me ajpën mã. Mã mehcuneate ampeaj kam, nee jũm mã me harën nare na me amji ton. Ne cute me cumã, por pê pahhi xwỳ ty ata kra pê Jõwat to ipipẽ, mã cute me hõmpun. Mãpea Jojata te me to ihhimpej to hajỹr he:

— Ca ha me akwỳ me Atarijkwỳj jũrkwa jamã, mãr quẽ nee jũ kam ihtẽm nare. Ne me akwỳ me Pahpãm to me amji kam hapac xà jũrkwa krã, ne kamhũmre intuwre pê pahhi xwỳ kra ata jamã. Quẽ ihhẽaj to jũm apu ihkra ita to jũ mãn prãm, ca ha me jũm ata pro ne mehcura — hajỹr.

Mã Pahpãm mã mehcajrën catêjê jõ pahhi te mam pahhi xwỳ kra intuwre ita japrõr, ne me kam mare mã ihkrã mã pahhi krãhkã mẽn, nepea cupê pahhi xà caxuw, hanea ne ihkrã kam ampo cacõimpêti ata jaxwỳr. Ne cute cumã ihkãhhõc kamPahpãm jarkwa ata jõr, ne to pahhi tuw. Mã mehcunea ame cumã me hũhkracahy, ne ame cumã caràr to:

— Pahhi tuw! Ca ha caku jàhtõa kam amji to ajpa! — hane.

Mã Atarijkwỳj te mehtãm xwỳj jipej ata te me harkwa xãmte ata kam hapac, ne ma Pahpãm to me amji kam hapac xà jũrkwa wỳr ipicahur, ne cute pahhi tuw pupun. Mãkrãhtare te hũtãr tu ne to xa, ne cama ame hakry, ne ame hõhhi cakõ. Mã Atarijkwỳj caràr, ne cute harkwa to:

— Cõt ca me acunea icuna mã me akên? — hajỹr, ne ihpeacre.

Mã Jojata te krãhtare jõ pahhi mã Atarijkwỳj curan na hũjahkre ne me cumã:

— Me to acato, ne nee Pahpām to me amji kam hapac xà jūrkwā kam mehcurannare. Ne por jūm te ihtehcajpar prām ata mea mā, atýj mehcura — hajýr. Mā cute mehpro ne ma pō mā me to cator, ne cute mehcuran, mā hamre.

Ne caxuaw pê cormā Jōwat na caku te xet peaj cākro, ihtýj cutepjê to ihhimpej kam ihtēm. Mā Pahpām mā mehcajrēn catêjê jō pahhipê Jojata ata te ihtehcajpar kam ihtēm, ne ihtýj hōtpê ihtehcajpa. Mācute mehkwy mā, pahpām cahàc krekà pê Pahar ata jūrkwā jūhhyr ne to hamre na, harkwa hyr. Mā hýrmā me mō, ne cute me hūhhyr.

Pê pahhi pêJōwat ata catyt kam Pahpām jarkwa kōt ipa, ne Juta jō pjê to ihhimpej to caku to cwarēnta ne ty.

18

Juta jō pjê jō pahhi Exequij

2 Pahhi Catêjê 18.13; 19.1-37

Ne caku nōa na pê Juta jō pjê kam pahhi nō ita hapry Exequij. Ne Krīpinkrēn kam ajco ihhimpej. Pê Axiri jō pjê jō pahhi ata kêanre, na pê nee Pahpām to amji kam hapac nare. Ne Exequij pê amji mā Juta jōpjê kam krī atajê cunea pytà. Pê hō krāhtare kwya hanea ne Krīpinkrēn pytàr prāmte me hýrmā me cato.

Pê ma Exequij Pahpām to me amji kam hapac xà jūrkwā wýr tē, cute Pahpām wýr, mā cute krī pytàr prāmte. Ne cute ihkà impejti ata jipôn, ne cupêhkàkêanre nō ata to ihkà, cute me cumā amji kīn nare name hahkre pej prāmte. Ne ma

cute Ixaj pê Pahpãm jarkwa to ihcakôc catê ata wÿr jũm kujahêc, mãr quê jũm cumã awjarê quê Pahpãm mã mehcajrên. Mã ma tẽ ne cute cumã hũjarên. Mã Ixaj te Pahpãm mã krĩ kam mehkrĩ atajê cajrên.

Mã Pahpãm te kam hapac ne cumã:

— Wa ha Axiri jô pahhi ata te hacpÿ mã hõ pjê wÿr amji jaxàr na meto, quê ha amji jaxà, quê ha curia jũm ihcura — hajÿr.

Mã hamre, amcro nõ na ma hacpÿ mã krãhtare atajê te hõ pjê wÿrme amji jaxàr to me amji kam hapac. Mã ihtêm xà wÿr Axiri jô pahhi te Exequij mãihkàhhôc juwahi, mã ihkàhhôc ata hũjarên to:

“ÿhÿ, por cõjkwa kam me Apãm Cati ata, ca nee ampeajkam ame kam gapac nare.

Quê Apãm Cati te, ite Krĩpinkrên to kên nare na me ijarên na,

ca ha nee kam megapac nare.

Ampo na? Wa ha itÿj me amji jaxà ne ame ato kêanre ne.

Neramã mehcunea te, por wa pjê kwÿ kam ite me amji hi ata ri,

ite ame ampoto kêanre na me cumã me ijahkre pej.

Mãnee jũ ri me hõ pahpãm cahàc krekà itajênõ te jũm pytàr nare,

na wa ite mehcunea to hamre tu” hajÿr.

Mã cute Exequij mã hõ kàhhôc ita kujahêc. Mã cute ipyr ne cahÿt jirô pê, mã Pahpãm to me amji

kam hapac xà jũrkwa wỳr to mō, ne cute kam hir, nePahpām mā ihcakōc to:

— Hā, me ijō Inxū Cati,
 apyxit peaj ne apê Ixaher jō pjê Pām Cati, ne apê
 cōjkwa jōPahhiti.
 Ca pjê kam pahhi itajê cunea to ahimpej.
 Ne caa pê ca cōjkwa mepjê to.
 Me ijō Pahhiti ikampa,
 ne pom Axirijō pjê jō pahhi te ihkàhhōcton ita
 pupu he.
 Cute atīar cuna mā ihcakōc xà kēanre ita to
 ihcakōc he.
 Me ijō Inxū,
 he ampeaj kam ri cute ampo kra me, krīxàre kwỳ
 cunea jipej,
 ne cute me hō pahpām cahàc krekà atajê to caxàr
 partu.
 Ne por me hō pahpāmcahàc krekà atajê akīn te
 nee ihtīr nare,
 na ri cute me to hamre.
 Ne ampona ri cute mehcunea to hamre? Nee mā
 āmpo na nare.
 He me hūmrea te ri pī me kēnte me hō pahpām
 cahàc krekà atajê ton,
 cwỳrjapê ri cute to hamre.
 Ne me ijō Pahhiti, pahhi ita pê me ipytà.
 Quê ha mehcunea me apyxit peajpê Pahpām Cati
 na me gahkre pej — hajỳr.

Jirō pê mā ri Pahpām jarkwa to ihcakōc catê
 pê Ixaj te pahhi Èxequijmā Pahpām jarkwa
 kujahêc. Mā harkwa ata hūjarēn to:

“Wa ite me ate Axiri jō pjê jō pahhi to me imã
 acakôc xà ata na me apar.
 Na quê ha nee me gō krī mā me hār nare. Ampo
 na?
 He pa wa ha me cupê me apytà” hajÿr.

Ne caxwa ata kam Pahpãm te Axiri jō pjê
 jōkrãhtare jãhtôa jipej. Ne irarà na Krīpinkrên
 catêjê pimprar necute me curê xwÿn jãhtôa tyc
 pit pupun.

Cwÿrjapê Axiri jō pahhi tehō pjê wÿr amji
 jaxàr pyrentu, ne hō krãhtare cahhur me, me
 cator. Mã amcro nō na mehakraa te mehcuran.
 Hō, pê Pahpãmpahhi Exequij jō amcro kam
 Krīpinkrên pytâr to hane.

22

Juta jō pjê pahhi pê Joxij 2 Pahhi Catêjê 22.1-20; 23.1-25

Ne pê caku jãhtôa jirô pê Juta jō pjê kam
 mehkrī atajê cunea hipêr me Pahhiti pê Pahpãm
 to mehapac kêt ne me cumã hikra. Ne pê
 cakuata kam krī jō pahhi ata japry Joxij, ne
 cupê hũmreimpeaj, ne quêt ihtÿj cumã Pahpãm
 pynâr prãm. Cwÿrjapê ri cute pahpãm cahàc
 krekà cunea tohamre, ne Pahpãm to amji kam
 me hapac xà jũrkwa to apu impej partu.

Mã amcro nō na, Hirquij pê Pahpãm mã
 mehcajrên catê jō pahhi ata apuPahpãm to amji
 kam me hapac xà jũrkwa kam mō. Ne cute
 Pahpãm jōkãhhôc weaj nō ita mã cator, ne cute
 ipyr, ne cute pahhi Joxij mã ihkujahêc. Mã jũm

te Joxij mã Pahpãm jarkwa na ihkàhhôc wej ata cahyt, mã cute impar, nehũ na ihpec pyrentu.

Ne cute Hirquij na hàhwÿr ne cumã amji jarën to:

— ÿhÿ Hirquij, ate imã Pahpãm jarkwa weaj kujahêc ata, jũm te imã cahyt, wa ite impar, ne ajte ipeacre. Ne mõi ne Pahpãm to me amji kam hapac xà jũrkwa mã axà, ne cumã icajrën. Ne cumã me papê Juta catêjê cunea cajrën. Ampo na? Cu ramã nee kam me pajapac nare. Mã ame pahkam incryac to incryc, mã hõ kàhhôc ita kam cute me pahna amji jarën — hajÿr.

Mã Hirquij me, mehkwÿ atajê te impar, ne ma Pahpãm mã mehcajrën catê cahãj ata wÿrme mõi. Ne cute me cumã pahhi Joxij te ampo cunea na ihpeacre, mã cuteamji cajrën na hàhwÿr xà na, cumã harkwa kujahêc atajê cunea jarën.

Mã mehcajrën catê cahãj ita te Hirquij mã harkwa to:

— Ca ha pahhi mã awjarẽ, nãmri Pahpãmte pahhi ata mã harkwa kujahêc to:

“Pa wa ha krĩ ita cunea jipej tu.

Nepor ihkàhhôc kam ampo kên cunea na ihhôc ata, quê ha ihkên to hane.

Ampo na? He me ikwÿ pê Juta catêjête cama ramã me ito hapac kêt,

neahti na ame hõ pahpãm cahàc krekà atajê kĩn, na ri ampeaj kam me kam icryc,

por cute ame ampo ton atajê incwÿrjapê.

Ne Joxij, atea ca gõtpe ipar, ne ikam mare mã, icuna mã,

ate apeacre na imã amji jarēn, ne amji pēakà
jipôn, ne acwÿr.

Cwÿrjapê ca ha nee ampo kên atajê cunea
pupunnare.

Wa ha nee gō krī to hamre nare, ca ha ahnaa
jū caxuw ty, wa hacormã krī ita jipej” —
hajÿr.

Mã hacpÿa mã pahhi Joxij wÿr cute mePahpãm
jūjarēn ita to me amji jaxàr, ne me cumã harēn,
mã cute impar. Ne cute mehwÿ to cuprōn, ne
hūpar xà ita to me cumã hahkre.

Mã cute me hahkre pej ne krī cunea kôt ame
ipicràn, ne kam cute ame pahpãm cahàc krekà
jūrkwa atajê cunea to me hamre partu. Ne
quêtcute amji kam hapac xà cunea to Pahpãm
to meamji mã ihmipej, ne catyt kam ihkôt me
ipa.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a